

Mještani sela Kruščica iz Viteza – Šampioni zaštite prirode 2018. godine u kategoriji neformalne grupe građana - građanske inicijative

Borba mještanki i mještana sela Kruščice za spas istoimene rječice odnosno za sprečavanje izgradnje dvije mini hidroelektrane je postala poznata u javnosti 2.8.2017, kad su u 5 sati ujutro svojim tijelima spriječile ulazak građevinskih mašina na obale Kruščice. Pri tome je došlo do fizičkog sukoba sa specijalcima MUP-a SBK koji su zahtijevali da se demonstranti sklone.

Mini hidroelektrana planirano je da se gradi u neposrednoj blizini izvorišta pitke vode kojom se opskrbljuje stanovništvo općine Vitez i veći dio grada Zenice. Mještani sela Kruščice su zbog suprotstavljanja ovom, za cijelu zajednicu štetnom, projektu bili izvrgnuti privođenju i sudskom gonjenju. Pored svega navedenog i dalje su ustrajni u svojim namjerama da se bore do kraja kako bi sačuvali jednu od najčišćih rijeka u Bosni i Hercegovini za buduće naraštaje.

Već su izvojevali nekoliko malih pobjeda:

1) Općinski sud u Travniku oslobodio je 22 žene iz viteškog naselja Kruščica koje je policija teretila za nepoštivanje naredbe policijskih službenika za deblokadu puta i prolazak radnih mašina firme Higrakon, koncesionara za gradnju mini hidroelektrane u vodozaštitnoj zoni Ilidža.

2) Kantonalni sud u Novom Travniku donio je četiri presude kojima su uvažene žalbe koje su u ime Inicijativnog odbora mještana Kruščice podnijeli Muris Đelilović, Islam Zukan i Rajif Hurem. Tako su poništeni zaključci Ministarstva prostornog uređenja, građenja, zaštite okoliša, povratka i stambenih poslova Srednjobosanskog kantona i predmeti vraćeni tuženom na ponovni postupak i odluku.

Mještani sela Kruščica nadahnjuju svojom ustrajnošću i požrtvovanošću, u vrijeme kad većina sve ovo promatra iz udobnosti i topline vlastitih domova ovi hrabri ljudi provode zimu dežurajući 24 sata uz rijeku koja za cjelokupno stanovništvo Viteza znači život.

